

歸

樸

齋

詩

鈔

歸樸齋詩集目錄

己集上卷

次韻答郭筠仙丈

附錄原唱

十一月晦日泊紅海盡處登舵樓乘涼見舟人所蓄白鷗  
口占一律己卯元日補錄之

山行

緝園

戊寅臘月至法蘭西國謁其君長授受 國書慰勞良厚  
頌及先人退爲此詩

次韻答李六容

寄懷李六容兼柬香嚴

送邵筱村回京二首

八月十五日夜森比德堡對月

并引

襍感五首

檢敝簾見舊作詩文襍稿束而藏之戲題一律

讀史漫成

前詩不愜心改作仍未是也姑並錄之

香嚴書詢近况詩以代柬

次韻酬俞蔭甫

附錄原唱

懷人八首

大純若駁琴瑟專壹誰能聽之戲作純聲律句  
後園牡丹盛開內人索詩口占一律兼示庚侯  
拈韻得魚書字率成二律寄示申夫

仙女

哭栗誠弟二首

栗誠訃至僚友各爲輓詩疊前韻謝之

黎蕓齋觀察奉使日本入都展 覲詩以餞之

輓沈文定相國

并序

送左子興之官新嘉坡領事

偶憶甲戌夏在長沙曾得一律補錄存之

維多利亞花 并引

松生賦維多利亞花詩甚佳效其體復作一首

鳳

四妹輓詞

衡嶽圖

元日與中戲作疊韻五言二章首章隔句爲韻次章上句以同韻四聲爲序憶而錄之

七夕

閏七夕

介石從弟見寄鞠餅穀芽餚

緝園十首

仲妹輓詞

凱生俸滿乞休松生亦因事暫歸詩以送行

雨中賞牡丹

青山

仙官

湯小秋書詢近狀仍有詩次韻答之

夢歸緝園成一律覺易數字錄存之

謝智卿以西洋畱影法照余蓄鬚髯小像自題一律  
夜坐偶憶戊寅首夏都門黃氏園題壁詩錄存之

九日

瓜田

歸樸齋詩鈔已集上

湘鄉曾紀澤劼剛署

次韻答郭筠仙丈

世變浮雲萬態馳白衣蒼狗自呈奇  
機鋒參透初聞道結習消  
除賸咏詩野鳥啼林春意早胡雛吹角夜聲悲  
清商流徵歌難和朝雨輕塵路已歧

火瑄飄輪不住馳周流入極已無奇  
一官祿俸甯論地萬國山川總入詩  
德業如公天下少窮荒遣戍古來悲  
蹙然繼我知誰至猶賴先生辨路歧

附錄原唱



十洲天外一帆馳蹤跡同君兩岫奇萬國梯航成勘局數  
篇雲海賦新詩罪原在我功何補壯不如人老更悲要識  
國家根本計殷勤付託悵臨歧

十一月晦日泊紅海盡處登舵樓乘涼見舟人所蓄白鷗  
口占一律己卯元日補錄之

九萬扶搖吹海水三千世界啟天關從知混沌猶餘竅始信崑  
崙別有山朔雪任迴溫帶熱南薰不轉鬢毛斑女牀丹穴尋鸞  
鳳卻見雕籠養白鵬

### 山行

禹跡江河萬古流史詳華夏略窮陬秦皇無術求三島鄒衍憑

空撰九州南北自教鵬運海古今非復貉同邱望洋向若嗟何  
補且遇青山汗漫游

緝園

緝園仙境白雲封往往羣真相過從鸞鳳六時調箏籥蛟龍萬  
狀走杉松游經海上三神島踏盡天涯一短筇儘有名山凝妙  
氣何如鳥鶴最高峯

戊寅臘月至法蘭西國謁其君長授受 國書慰勞良厚  
頌及先人退爲此詩

聖澤覃敷大九州冠裳萬國荷天休寵閑白雉陳 螭陞旗繡  
青龍照蜃樓闐苑風隨仙露重 敕書香帶 御煙浮從來忠

信行蠻貉莫訝戎王問故侯

次韻答李六容

窮荒無雁只爰居繫帛遙傳海上書小隱知君非忘世遠遊憐  
我似逃虛夢魂楚水吳山裏詩興寒煙宿雨餘與子忽分蠻觸  
角人生何處問乘除

寄懷李六容兼柬香嚴

鸞皇戢羽豹藏文劍閣山頭湘水濱兩地酒尊同酩酊十洲棋  
局任紛紜乘槎誤覓支機石杖策新成出岫雲妒殺蘧園高臥  
叟何年水竹遣平分

送邵筱村回京二首

朝雨輕塵灑節旄離觴勸盡紫蒲桃大鵬運海迴三島翔鶴淩  
風上九臯秋到窮荒霜信早天連瀛隄月輪高加餐崇德爲君  
壽鞭策風霆奠六鰲

倉卒珠槃玉敦間待憑口舌鞏河山功成燕領軍畱塞利逐蠅  
頭虜叩關貢馬頒茶增互市雕龍炙輶動朝班仗君此去紓籌  
策更爲庸駑乞 賜環

八月十五日夜森比德堡對月

井引

森比德堡爲鄂羅思國所都地瀕北海良天佳節月明  
雲散是日國人頂禮祆神鐘聲四起耳目所觸感慨叢  
生酒後成章質諸寮友西人謂海潮爲月力吸引結句

采用其說或者爲後來詩人增一故實耶

祆廟園樓百仞高  
梵鐘清夜吼蒲牢  
見聞是處駝生背  
官職無名馬有曹  
明鏡喜人增白髮  
奚囊搜句到紅毛  
冰輪何事搖滄海  
去作長天萬頃濤

襍感五首

廿年稽古注蟲魚  
搜括羸秦劫火餘  
爲考諧聲類隔術  
兼通畫革傍行書  
九千文字成嚆矢  
十萬程途聘傳車  
安得上林親射雁  
羝羊未乳返吾廬

銅梁山麓澗之湄  
山色蒼茫雲意奇  
荷發雙池香在葉  
桐高百尺老無枝  
未成避世謀中隱  
正坐封侯悵數奇  
寄語九峯山下

士汲泉應及在山時

驥服鹽車上太行眼中驚蹇任超驤九方臯死心先冷八尺身  
存項總強豈有薔薇頒阜樞誤尋苜蓿走沙場何年外阪爭途  
罷一騁蘭筋陟六方

朝驂黃鶴上瀛洲無數仙靈相酢酬九轉成丹無火氣三緘在  
口是清修朝從葉縣飛雙舄睡倒華山合兩眸笑我未諳兜率  
例綠章猶抱杞人憂

作隊長鯨集海東怪雲腥霧掩晴空六弦金版都陳策五檠梁  
軸備討戎但願奇功歸謝傅自甘無識似桓冲澶淵一擲誠孤  
注莫怪南箕瑩帝聰

檢敝篋見舊作詩文襍稿束而藏之戲題一律

屏除鄭衛肄簫韶培溉芝蘭黜艾蕭大叩大鳴師道古小慚小  
好世風澆故經赤水留珠跡不廢藍田養玉苗他日名山藏不  
住傳之七十二峯樵

讀史漫成

織婢耕奴職有歸書生講武箭鋒機經綸十萬橫磨劍組練三  
千未試衣堅白崇朝同與異雌黃終古是耶非班生鬻筆韓諛  
墓史氏闕文風已微

前詩不愜心改作仍未是也姑並錄之

搖筆春江下瀨船競援糟魄折輪扁高談堅白妙當世正恐殺

青欺後賢嗜好苦茶甘若薺揄揚寒谷暖生煙史歲粗卒丹鉛  
業熱血雄心兩廢然

香巖書詢近況詩以代柬

去國中郎歸典屬漢廷無足重輕官不嫌牛耳先滕薛姑就龜  
陰索鄆謹蛇蠃成功容蟹寄蜩鳩得意笑鵬搏褒誅袞鉞知誰  
是清夜捫懷宇宙寬

割地通商輕與重百鈞一羽更何疑詞強欲爲雞添足語雋防  
譏鼠有皮世界三千身似粟年華卅二鬢如絲昨非今是未爲  
晚季子相如彼一時

次韻酬俞蔭甫



風捲冰洋積雪來歲除無信報春回地連八極成銀海爐隱雙  
牆響石煤景短似催蒼鶴鬢愁多且盡綠鸚杯故人芳訊梅蘭  
竹使我神游說法臺

拋捨蓴鱸逐擾匆思歸甯獨感秋風開邊易著甘都護仗節誰  
稱富鄭公議頗主和非怯戰事求免罪敢論功箴言勗我蘇明  
允撥卻煩襟且自雄

附錄原唱

巴黎漢使有書來芳訊迢遙萬里回玉版新牋同貝葉金

壺妙墨異松煤

來書紙質堅白出外國新製墨光五色乃蔗霜熬鍊而成非松煙常品也

懷人尙作

江南夢餞歲剛拈海外杯

來書作於嘉平廿有七日

一紙封題珍重甚遠

從六甲寄蘇臺

又聞使節去匆匆五日飈輪走似風

聞將由法至風輪車五日可至

直以苦

心持大局不妨清議聽羣公魯連排難無雙士魏絳和戎  
第一功舊隸南豐門下籍喜看繼起有英雄

懷人八首

鄂羅斯國壯洋濱二月無花雪作春苦憶蘧園多麗景廣開藥  
圃應芳辰飽經四海離奇事歸訪三山縹渺人意態已從懸擬  
得容顏衰朽氣清新

劍閣山人老未閒扁舟東下水雲灣要將荆玉蛇珠筆徧記天  
台雁盪山遠道無書詳近狀謫仙有術駐童顏明年訪子西湖

上看我頽然兩鬢斑

深谷爲陵海有桑眼中不見賀鄱陽迢迢四萬五千里擾擾東  
西南北方夢裏有時談律度書來相與較宮商何年湘水衡雲  
曲我撥鵲莎君鼓簧

海國風光又一天夜郎甯識漢山川自聞天使談經史始信中  
華有聖賢藉甚聲名薺鼎貴翛然神采畫圖鮮螭縑鴻緒慙非  
選贏得千莖雪上顛

淮上將軍百戰軀鍵門兀坐一迂儒忽承 綸綍來天闕復領  
鰲舫鎮海隅一別光陰荏脫矢幾時晤語萼聯村欲知天柱地  
維象示汝十洲三島圖

屢散千金窮欲死清狂四海王先生西川老去依嚴武北海今  
聞薦禰衡笥底專經誰可授囊中佳句若能贐草玄不博朱丹  
穀借與侯芭著姓名

落魄江湖余世松黃金入手一揮空可憐茅屋蔬飧計耗向瑤  
籤碧簡中有興挂帆游滬瀆無端投筆走遼東幽琴未達鍾期  
耳渺渺乾坤轉斷蓬

美人遺我忘憂萱何以酬之藥石言龍尾不嫌終阜帽鳳毛豈  
定在朱門晴雲秋月塵難染玉尺冰壺品自尊澄澈侶鷗亭下  
水令人知有醴泉源

大純若駮琴瑟專壹誰能聽之戲作純聲律句

地近北海積雪厚心懷江鄉春花飛試控皓鶴俊鵑去攜將晴  
雲清風歸利藪競逐失與得名場相爭真耶非了卻薄領謝朝  
鞅銅梁山根披蓑衣

後園牡丹盛開內人索詩口占一律兼示康侯

魏紫姚黃各世家偶傳苗裔到天涯小園春去鳥千嚙閒舍晝  
長蜂兩衙脈脈含情邀夜月翩翩作態映朝霞故鄉松桂閒無  
主卻戀窮荒富貴花

拈韻得魚書字率成二律寄示申夫

隋珠豈意供彈雀寶鼎無端遣柱車以馬未嘗能喻馬非魚無  
怪不知魚莫求楚匠攻和璞枉對燕人說郢書好惡至公從古

少緇衣巷伯意何如

空疎不解弄麝書腹笥便便何所儲慷慨借人乘有馬倉皇作  
客食無魚結廬綠樹千章裏避世黃梁一夢餘煅得純鋼成繞  
指更鳴佩玉曳長裾

仙女

清似姮娥貴宓妃九重淪謫馭煙霏碧桃將實飄然去黃竹成  
林久未歸仙侶競堆三角簪上清同賜五銖衣何時南嶽膺丹  
詰七十二峯司翠微

哭栗誠弟二首

題彼脊令飛且鳴日歌斯邁月斯征媿余嬾情真無匹仗汝騰

騫紹所生文字失權鸞翻鍛家門不幸鳳樓傾世無宣聖知顏  
子好學誰傳死後名

埋頭典籍擷菁華知也無涯生有涯百鍊精剛鎔紫電九還伏  
火養丹砂爻占虎豹大人變歲在龍蛇賢者嗟慧業淪亡糟魄  
在一編算草蔚成家

栗誠訃至僚友各爲輓詩疊前韻謝之

百草爭芳鵲鳩鳴黯然丹旒正南征精魂入夢來荒域稚弱還  
鄉仗友生擎水北冥無海運經天東注似河傾賓朋輓句哀成  
卷爲闡幽光播令名

不可淹留是歲華鬢毛斑白尙天涯深知戀棧空餘豆頗欲安

爐去煉砂故國音書多懊惱中年詩集半傷嗟低頭一拜陶彭  
澤萬事乘除問酒家

黎蘼齋觀察奉使日本入都展 覲詩以餞之

萬古窮荒西海西輦航飛渡碧瑠璣聲名蔚起孫陽馬學養純  
如紀涓雞有數英雄終入彀無言桃李自成蹊書紳忠信徵儒  
效溟渤看君靖鼓鼙

廿載交親結笠簷桑田成海谷爲陵長林選勝朝攜酒旅館論  
文夜對鐙東去瀛洲雲好色北朝天闕日初升親朋問我支  
離態齒豁眸昏百不能

輓沈文定相國

并序



往歲承 恩北闕奉使西洋雖拜爵王庭未列梁公之  
桃李而 賜筵譯署常叨顯父之筓蒲汕汕歌南有之  
魚甘瓠纍於樛木蜎蜎賦東徂之蠋苦瓜烝在栗薪俄  
而鯨海掀騰鼇山震蕩侵地未歸夫汶上飛烽不滅於  
澶州誹疑撓俊桀之權飫聞塵論簡練乏戎兵之實空  
詔鷹揚嚼雪牧羝仗節之艱難固爾涉冰履虎秉鈞之  
惴慄可知喜中外之同心叶斷金於蘭臭判安危於一  
髮輦磐石於桑苞 朝廷之威德炳焉輔弼之謨猷偉  
矣武鄉侯之盡瘁宗畱守之病疽雖時勢之不同實忠  
誠之無異興西州之慟豈獨羊曇發下里之歌深慚宋

玉九天咳唾回思珠玉之音萬古雲霄空效羽毛之詠  
輒於四萬餘里之外成茲五十六字之篇

精誠長共日星懸意量難從竹帛傳好士不嫌求駿骨矯時非  
爲惜豚肩功成西域新收地光閭東垣夜質天指下高山流水  
境發聲誰與辨徽絃

送左子興之官新嘉坡領事

花萼初春日未中左郎天矯氣成虹藏身人海雞羣鶴展足天  
衢鳳勒聰涵養生機宜守樸指揮能事莫矜功旅亭無物裝行  
篋贈汝箴言備藥籠

外阪鹽車豈足多驂駟屏不與同科苦瓜鸛埵賡零雨酸棗龍

淵塞潰河顧我自嗟還自笑喜君能飲又能歌三年歡會駒過隙不盡深杯奈別何

偶憶甲戌夏在長沙曾得一律補錄存之

忽有涼風生水紋遙天雨氣散清芬此間玉兔臨新沼何處金蛇躍暮雲未絕貪癡緣嗜古常多罣礙爲離羣景光如許須行樂卻任閒愁百緒勞

維多利亞花

并引

歐羅巴人喜爲汗漫遊得無人跡荒洲孤嶼或異種草木鳥獸則以始見之人名謚地與物英吉利有游阿美利加洲者觀奇花產澤中花大如車輪葉周十丈許爲

其博大清妍特異凡卉乃以英國女主之名名焉僚友  
初結詩社賦茲花余亦同作

玉井蓮花十丈青奇葩終古不凋零長梯摘實來西域太華騰  
光照北冥聖瑞雖非堯歷英霸圖猶兆楚江萍藐姑仙子如冰  
雪肇錫嘉名比德馨

松生賦維多利亞花詩甚佳效其體復作一首

自騰光燄照狴獠漸列禎祥比鳳麝桂府仙娥離皓魄蓉城舊  
主降紅塵品香蘭合稱王者論豔蕉猶號美人收取園林名貴  
氣乘時併作一家春

鳳

博桑西境析支東五色卿雲擁碧桐上有鸞皇年歲古漸看雛  
鳳羽毛豐文章豈與凡禽伍威望終爲眾鳥雄身欲奮飛無健  
翮山林何以異樊籠

四妹輓詞

塵封脂盞鏽生鈿茹檠餐冰十二年兩頰藍田畱玉種九還丹  
鼎證金仙門楣得汝增光燄德性憑誰載簡編淚眼已枯無可  
拭祇添白髮上華顛

陸雲名譽動京師一蹶無由到鳳池忽忽生離成死別煢煢寡  
婦挈孤兒可憐丹旆還鄉日又是青琴得道時夢撫兩棺成一  
慟覺來海角望天涯

衡嶽圖

祝融峯麓是吾廬開戶晴嵐綠浸裾躡屐定知何歲月披圖喜  
識舊鄉閭西天蒼蘓含苞日東海蓬萊返棹初汗漫之游今倦  
矣山靈聞我賦歸歎

元日興中戲作疊韻五言二章首章隔句爲韻次章上句  
以同韻四聲爲序憶而錄之

谷澳簇竹木葱蔥同崆峒複麓築樸屋空礪通雄風族菊毓馥  
郁豐菰叢蒙茸肅肅復穆穆鴻濛狎穹窿

騅駟辭羈維螭鯢離陂池梓里已仕始鉉基治菑時議肆避地  
志而滋悲絲疑慄慄怵失秩蒼龜貽訾嗤

言集二  
七夕

海外談天別有球誰聞織女詣牽牛  
細君開篋分鍼縷弱女擎盤供棗脩  
鄉國雖遙存舊俗安平是福莫多求  
天孫若賜支機石歸理蠶桑百不憂

閏七夕

秋老銀河靜不瀾三旬小別又團圓  
雙層結網蛛增巧兩度成橋鵲亦歡  
銅漏玉儀添永夜星房月帳護輕寒  
耕車歸路滂沱雨相見時多別轉難

介石從弟見寄鞠餅穀芽餚

柴門不掩竹籬斜籬內茅亭是酒家  
春宴老農秋老圃夜觀山

月曉三花閒情我亦耽糟汁樂歲人爭曬穀芽行徧天涯鄉味

好尊羹休道士衡誇

余嘗啜尊羹以爲無味凱生吳人亦云然當日舉千里尊羹與未下之鹽豉並稱必有說

### 緝園十首

帶礪河山誓永存台垣敷歷浴承恩叨陪蟬冕金璫列追溯

龍門積石源此日蓬生原易直當年芝茂不因根嗟余老大多

忘事卻憶黃齏潔晚殮

八本堂

肥甘適口過生灾護惜時花在半開月不長圓天尙爾齋名求

闕意深哉光明下濟謙常福名位兼隆患所胎面命手攜彝訓

在好鐫鐘鼎伴雲雷

求闕齋

先子思親望白雲巋然高館照榆枌精神膀上瞻遺蹟詩禮庭



前憶舊聞績學求通三實意讀詞難紀卅年動濫將薄植承餘

蔭縹組 朝班載惠文

思雲館先太傳自署額館左偏爲  
三經三史三子三集三實之室

游塵在藪鳳棲桐奎壁流光互碧空世澤畱遺書萬卷危樓坐  
落竹千叢昂頭漫說青雲志轉瞬看成白髮翁何日閉門湔俗  
慮猶將耄學補童蒙

無慢室

論詩夙昔愛陶潛利祿心脾也自恬木茹草耕時本異林巢河  
飲意無厭夢回沿上新花徑渴想饑東舊酒帘牆外青松應更  
茂幾年雷雨沐蒼髯

望益廬

晤對嚴師靜不哢東京祭酒許無雙九千餘字蔚成卷七十二  
峯青入窗蠹簡作城身自鎮龍文鑄鼎力能扛雄心欲拔千軍

幟獨樹中權素錦杠

歸樸齋

夢中常得見東坡談笑春風釀太和  
喬嶽不嫌宮部婁涓流亦  
解學江河乘槎遠引三江外搖筆都成七字哦  
丹熟未將凡骨換笑囊佳句苦無多

夢瞻廬

止水無波百慮沈瞿然撫劍作雷音  
昂昂火色鳶肩志翼翼春  
冰虎尾心世事幸無龍戰野時賢狠許鶴鳴陰  
梨楂豈可同年語紹治爲裘愧未任

淵默雷聲館

存樸亭高與夏宜峯巒環繞化工奇  
月移庭竹來疎影風曳山  
松轉曲枝稚子擘箋求作畫女兒分韻學裁詩  
六年此樂成追憶雲海蒼茫天四垂

存樸亭

緝園沼岸百花鋪水榭頽然峙右隅曉露潤花香世界清泉入  
沼小江湖隄根白鷺馴如鳴泥底青魚美似鱸粉墨精良藍本  
在倩誰濡筆繪成圖 凝芳榭

仲妹輓詞

弟妹翩翩各鳳麟  
衰然門祚照鄉鄰  
蹉跎今似日將昃  
寥落漸如星  
擢晨固識百年同  
一夢那堪數月喪  
三人濫叨名位曾  
何補枉折同懷骨肉親

叱馭鯢鵬厯宇寰  
穹廬寄寓畫扁關  
疊聞死喪憂成痼  
幼習艱劬靜不閑  
遷地本期能養病  
離家休憾未生還  
西方世界如非妄  
近宅靈山鷺嶺閒

凱生俸滿乞休松生亦因事暫歸詩以送行

游徧十洲三島旋邱園仍作地行仙一瓢微賸廉泉水二頃應  
營負郭田藉病養閒非拙計讓君先我著歸鞭各畱詩酒相歡  
興更結湖山未了緣

玉樹根深骨格奇籠山照海發華滋風雲常助拂霄勢霜雪忽  
摧連理枝造物灾祥無定理人生悲樂且因時同舟仙侶眞開  
士悟徹圓通更莫疑

雨中賞牡丹

小園連日滂沱雨正是牡丹花放時深恐狂飈摧嫩蕊特開新  
戶近疎籬路通三徑苔常滑齒折雙痕屐不知妻女知吾饒興

會濡毫求續去年詩

青山

青山爲郭白雲闔似於桃源共一津  
修竹蔚成千畝綠好花聯作四時春  
渾忘魏晉承何世邂逅羲皇以上人  
誤趁漁舟歸未得舊盟何以證松筠

仙官

鞭虎騎鯨鎮海嶼玉京朝罷下天衢  
豈徒霧氣迷三里直放霞光照八區  
冶匠莫誇行火術壺公可有召軍符  
道高應使千魔伏含景蒼龍佩得無

湯小秋書詢近狀仍有詩次韻答之

閒愁壯志一身兼  
照眼繁霜兩鬢添  
朔漠飽嘗牛乳酪  
王人饗有虎形鹽  
禿毫作字師行儉  
諧語成詩效子瞻  
了卻簿書無一事  
麝膺香篆繞螭匳

夢歸緝園成一律  
覺易數字錄存之

緝園閒地苦無多  
亭榭參差碧澗阿  
一面衡山當戶牖  
數椽鄰屋繞坡陀  
小橋止水通流水  
連沼紅荷間白荷  
林密淵深魚鳥樂  
莫貪香餌戀新圻

謝智卿以西洋畱影法照余蓄鬚髯小像自題一律

眼中東海甫生桑  
鬢髮無情颯已蒼  
諱老欺人原可笑  
駐顏從古本無方  
自驚圖畫年年改  
不殖鬚髯日日長  
一割鉛刀藏劍

室而今可似舊鋒芒

夜坐偶憶戊寅首夏都門黃氏園題壁詩錄存之

芳草如茵柳絮飛桃花流水送春歸  
檐前絳雪薇長豔階下紅雲藥正肥  
作隊蜜蜂常識路掠人胡蝶早忘機  
綺羅叢裏耽幽寂嬾性從來與俗違

九日

連旬苦雨浹辰風吹送層雲盡  
向東屋瓦晨霜疑雪白園林晚葉代花紅  
春秋佳日原相嬾齒髮頻年漸不同  
去歲登高圖畫在添毫自改紫髯翁

瓜田

三頃瓜田雨露均寒藤晚熟味猶醇貪嘗異味不知饜正恐豐  
年難屢臻白髮喜親羈旅客青山曾約宦游人鱸魚蓴菜吾鄉  
少苦憶家園嫩刺椿



歸樸齋詩集目錄

己集下卷

次韻答周荇農閣部丈

附錄原唱

次韻答楊商農

附錄原唱

異俗

游眺

哀余佐卿

久不爲文視少作翻以爲佳賦自警

養生

無題

并引

懷王壬甫

四十四歲生日作

翼日又作二首

睡起

清臣約登南山俯瞰木司姑城應之而不果行爲此詩

書太史公六家要指後

次韻答袁翔甫

祖志

七夕絕句爲滑稽語推而及於上元花朝寒食端午得五

首異日興至且有續章

演司空表聖詩品二十四首

雄渾

冲澹

纖穠

沈著

高古

典雅

洗鍊

勁健

綺麗

自然

含蓄

豪放

精神

縝密

疎野

清奇

委曲

實境

悲慨

形容

超詣

飄逸

曠達

流動

輓陳松生四首

送松生殯城西饗堂歸來夜不成寐作詩自遣

哀弟栗誠從弟符卿思臣暨余佐卿陳松生

次韻答日本人金尾藍田

裁畧

哭外姑劉母王夫人二首

王芑棠觀察之春題歸樸齋詩集次韻謝之三首

次韻答芍棠二首

疊前韻再和芍棠

哭仲父澄侯公二首

留別劉芝田太常二首

次韻答王子裳詠霓四首

次韻答楊誠之兆璿四首

次韻答許竹筠四首

輓李香嚴

次韻答左子興二首

次韻答陶槩林丁亥元日二首約人日同游琉璃廠書肆

兼訂逸齋做庵

次韻答王壬甫

疊架林前韻柬莘畚仁安光普瑞生兼呈逸齋做齋

壽彭麗生丈

題索佳奇卓崖先生家書冊後

哭廣錫兒

題日本使署參贊官梶山龍溪鼎介所藏石拓賀季眞草

書孝經

題張友山中丞頤園圖

題吳禮耕遺像并事蹤圖

題徐頌閣少宗伯見示月儀帖

并引

次韻題恭邸歌唐集句圖

以團扇求叔平丈書自作詩未得朝廊待漏聞誦頌者致  
它人詩有人與秋鶴同一病之句不無歎慕歸呈一律  
叔平丈既書扇乃人與秋禾同一病耳再呈一律

題自作畫

苦瓜

龍眼

爲佩衡相國丈畫蟠桃靈芝題平仄句一律

題徐小雲少司空竹隱廬圖



爲潘伯寅大司空畫師子紈扇率題一律 并引

爲徐頌閣宗伯畫師子紈扇題律 并引

題畫

爲丹初相國年丈作瀑布圖題二絕

次韻答何潤夫乃瑩見賀五十歲生日

題所畫繆石逸延福紈扇

題所畫孫燮臣少冢宰世丈紈扇 并引

題所畫徐頌閣少宗伯扇

題所畫吳漁川甥扇

爲醇邸畫宮扇二柄各題一律 附錄 醇邸和章

應教繪扇題詩蒙

醇邸依韻賜和并惠石搨

四

聖御筆書畫謹疊前韻賦謝

次韻奉和

醇邸玉照亭賞梅一律

附錄原唱并醇邸和章

邸園侍飲蒙賜長律謹疊前韻奉和二首

蒙

醇邸賞五色菊四盆賦謝

附錄醇邸和章

題瞿子玖學士王父魯青府君手寫自濟圖暨德配湯太

夫人分鑑課子圖

題李之純所藏岳忠武名章印本

次韻答瞿子玖學士題歸樸齋詩集一律

題所畫十三弟靜臣扇

題所畫俊師姪扇

題所畫聶仲芳觀察妹丈扇

題所畫邵筱村中丞扇

題所畫郭仲詒外甥扇

題袁爽秋農曹昶詩集

次韻答日本使大鳥圭介公讌詩二首

壽陳寶渠太守福勳八十生日

題所畫劉博泉給諫恩溥扇

歸樸齋詩鈔已集下

湘鄉曾紀澤劬劬著

次韻答周荇農閣部丈

別境奇蹤海外多，簿書粗了得婆娑。  
放歌小鳥歡鳴樹，縱飲長鯨渴吸波。  
忠信倚衡良有效，清閒是福更無它。  
水樓登眺歸來晚，村外羣羊下綠坡。

繞隊須髯不厭多，行吟時復一援婆。  
娑且欣異地同明月，姑任流年逐逝波。  
海國風雲從變幻，漢官裘帶自委佗。  
獨憐學殖成荒落，慚愧培翁譽小坡。

附錄原唱

寄到山資十笏多發函望遠日摩娑翳帆西指潮添信龍  
節東移海息波頗擬樓蘭驚介子已聞陸賈下臣佗希文  
侍後忠宣接此事吾猶勝老坡

次韻答楊商農

湛然佳句似崔峒細楷妙如蘇武功道義論交同伯仲別離羈  
宦各西東遠逾溟渤重相見稿信文章老益工顧我疏慵成底  
事撫心無復舊時雄

江南詞藻盛蘇杭金粉餘風入澧湘息馬投戈論翰墨雕龍炙  
輟騁雌黃紛華人似葵傾日澹遠君如菊耐霜志氣清明文自  
茂從來素質易含章

附錄原唱

迢遙使節駐崆峒絕塞風雲曠世功全局能支三極北狂  
瀾早障百川東防秋都護真無忝學語參軍愧未工兩代  
侯門知遇感重勞推轂薦揚雄

浩蕩滄溟一葦杭回頭衣帶起瀟湘腥風夜撼鯨波黑毒  
霧晨蒸蜃氣黃萬里孤征身似粟八年重見鬢添霜前徽  
不遠饒歌在願譜新詞續舊章

異俗

討論寒冰一夏蟲漸從文軌辨殊風夜興夙寐民稱便女倨男  
恭禮所崇偶有朔朝逢月滿或瞻南極認天中惟餘一物終難

貶囊有黃金處處通

游眺

及時行樂光陰短久客思歸歲月長  
照眼雲天臨戶牖蘊頭簪  
領襟縑緗寂寥頗復生幽趣游眺方知在異鄉  
舉足遂成名利客極閒鷗鷺爲魚忙

哀余佐卿

莽蕩乾坤夏復秋桑田東海豈人謀  
親知聚散盤中永事物成虧  
水上漚頻歲期功皆弟妹舊時朋輩  
半山邱彭殤等是駒過隙死者既悲行自憂

棘闥鏖戰績難成摩厲霜鋒起忿兵  
改試玉樓天上記罷爭金

榜世間名馬能千里伊誰識鳥已三年未許鳴早解文章憎命達當時何不請長纓

久不爲文視少作翻以爲佳賦詩自警

童年文字壯猶矜換骨無丹已可徵質美譬如金未冶學勤宜似日方升久拋鉛槧勞塵事參透機鋒亦下乘何日詞場重樹幟更揚華彩試青鏐

養生

疎慵聊可葆天倪鬢髮改觀神自怡酒不解愁猶有睡心無所寄付諸詩不貪甘味防牙腐戒坐深更爲目眵非敢矯情言退隱養生端與退相宜



無題

并引

玉谿生寓感慨於風情語不盡解而意味已深輒效其體他日有疑余以蘇子卿胡婦之樂陶秀實弱蘭之累者亦復大佳不足自明也

春盡尋芳自怨遲故爲驕蹇正情癡瘦畱豐態滿雙頰笑帶啼容蹙兩眉瓊拌脂缸珠拌粉金鑲蘭藥玉鑲芝昌陽香溢盆池外過院東風未盡知

邂逅高唐日未曛誰言暮雨又朝雲佩環畱質亦何益香火尋盟空復云雁帛傳書詢隱語鮫綃織句擬迴文蓬山有客聞長恨不怨君王怨六軍

懷王壬甫

秋林茂實斂春英  
龔魏文章數弟兄  
攪動飛黃騰達意  
發爲堅白異同鳴  
愛人以德叢人怨  
毀汝之言玉汝成  
國語一編新出手  
魚龍噴沫鬼神驚

四十四歲生日作

志趣常隨景物徂  
故吾猶恐勝新吾  
齒牙易落如瓜熟  
鬢髮先凋似草枯  
楹鑿本期延世德  
節旄敢謂紹前謨  
安劉事業書傳後  
可有餘縑寫亞夫

四十孤辰又四年  
螭伸蛇蟄總關天  
近於閉塞成冬意  
仰測循環造物權  
壯志未酬行老矣  
清班濫竽亦徒然  
得歸南畝尋農

父差勝東瀛訪列仙

翼日又作二首

五十始衰名曰艾我今猶少六春秋  
敖嬉尙有兒時趣清健應緣物外游  
書識佞盧初制字官臨神禹未分州  
獨嫌詩冊多愁語大抵吟詩易惹愁

庭訓師傳久漸忘箴銘自撰饋貧糧  
終身憂匪一朝患繞指柔須百鍊剛  
聲聞過情君子恥伎求胥泯聖人臧  
安排早覺黃梁夢豫蓄生機到梓桑

睡起

萬國身經奇世界半生目擊小滄桑  
亡羊不訝臧同穀腐鼠何

勞惠嚇莊繞地十分三是土憂天一日九迴腸年來益覺名心澹好夢時時在故鄉

不隨流俗論升沈消卻千端躁競心試歷艱劬徵所學翻從媚嫉驗知音薰蕕同器品原異桃李不言春自深魚躍鳥飛都入曲海天無際獨鳴琴

清臣約登南山俯瞰木司姑城懸之而不果行爲此詩

窮荒亦有好峯巒躡屐揜筇忽畏難平昔漫誇腰腳健早衰不  
僅鬢毛殘老之將至一彈指逝者如斯雙轉丸歸去衡山千障  
疊敝廬也在翠雲端

書太史公六家要指後

龍門書以謹嚴傳李耳韓非共一篇特立世家崇魯叟炳然儒  
教麗中天六家要指尊黃老兩代文心異軌躔定有寓言通妙  
契休將譚識議前賢

次韻答袁翔甫

祖志

鍾山煙嶂峙龍鸞白石青溪次第看賸有隨園蹤跡在藐然芳  
躅步趨難春風煦物和如釀秋水爲神靜不瀾私淑有年成底  
業心驚日月跳雙丸

勝蹟樓臺已陸沈翠微明月照亭心肯堂賴有文孫健傾蓋先  
知績學深僕僕宦游同李石翩翩書記似繁欽惠然貽我奚囊  
句角調清於出塞吟

七夕絕句爲滑稽語推而及於上元花朝寒食端午得五  
首異日興至且有續章

盈天星斗影寥寥同讓冰輪煥九霄底事人間鐙火社不將除  
夕易元宵

領袖羣芳獨占魁得春尤早是寒梅花朝道是花生日可記梅  
花十月開

禁煙云爲介推燔飲水何能祀屈原更異周官修火禁豫知縣  
上有冤魂

一卷離騷詔百神蛟龍西海作梁津如何食苦蛟龍竊棟葉絲  
筍囑世人

天宮晝夜纔終日人世春秋已四時  
日日相逢更何恨卻勞塵俗代傷離

演司空表聖詩品二十四首

雄渾

紫氣崑崙廣野閒流如煙景駐如山  
黃河天上來舟楫絳闕雲中照  
闐闐北海培風鵬有翼南山隱霧豹無斑  
遍游穹顙三千界祇仗驂騑十二閑

沖澹

茅齋闢戶對芳洲峭石奇峰擁後樓  
山徑迢迢雙蠟屐江天漠漠一魚舟  
雲生幽谷有閒意水度澄潭無急流  
山簡未醒元亮

醉獨臨黃菊賞清秋

纖穠

桃花方盛杏花稀  
草長江南鶯亂飛  
曉氣五更開芍藥  
春光十色上薔薇  
描摹天際虹霓影  
點綴河陽錦繡圍  
搜輯玉臺存豔體  
琉璃盤滑走珠璣

沈著

九陌樓臺擁帝宮  
神臯佳氣曉龍葱  
高山大壑藏龍虎  
古鼎宗彝鑄鳥蟲  
聞有海鼈能立極  
不妨天馬自行空  
欲知巖險聯襟帶  
灑墨成圖一掌中

高古



積雪崑崙夏不消寒雲曉護山椒無枝老樹參天立出泱長  
河繞麓遙道自王倪傳齧缺語聞疑始告參寥天風萬里吹胸  
臆坐嘯泠然協九韶

典雅

翼然亭榭碧江濱文藻芊眠一俊人萬卷圖書長守富四時花  
樹迭爲春墟煙不動連雲影山雨頻來濯世塵吐棄下方凡近  
語笙歌鸞鶴鬪清新

洗鍊

去盡陳言探奧蹟吐詞欲與六經同田收嘉穀三時力鼎養還  
丹九轉功青鏡拂塵光似月白圭磨玷氣如虹太清不遣微雲

泮萬籟無聲一笛風

勁健

筆颺飛隼九霄翰墨倒游鯨百仞瀾劍外雲山傾夜雨巴東雪浪走春湍錕鋹刀切如泥玉霹靂弓催陷陣丸早晚王師收海微金鑄舞曲付司干

綺麗

風信日華春爛漫花英柳絮畫綰紛忘機峽蜨穿蜂陣得意鶯鶯領鳴羣綠舫江頭搖碧浪朱樓天半接彤雲汀洲靄靄煙籠樹欲往游觀且俟君

自然

語不驚人祇自娛神奇乃與化工俱不雕和氏連城璧忽得梁  
王照乘珠失水巨魚歸大壑追風良馬試康衢畫工解試天成  
趣含漱丹青喚作圖

含蓄

煙嵐靄靄樹重重何處須彌最上峯餘甌未伸閑駿馬乍明仍  
滅見真龍筆工垂露書逾密花賞含苞色倍穠領取纏綿無盡  
意雲夢八九在吾胸

豪放

野鶴翻雲驥脫羈世無嵇阮更誰師常懷控鶴游仙意不廢聞  
雞起舞時四座冠裳名下士九天珠玉醉中詩澄懷萬頃波濤

闊強斂驚才趣轉奇

精神

新晴萬里耀韶暉  
濯髮滄浪向日晞  
醉寫蛟龍穿壁去  
仰看鵬鶚負天飛  
叢臺嘯罷風生谷  
獵騎歸來雪打圍  
忽憶鄆城渾脫舞  
興酣墨汁灑裳衣

縝密

仙衣無縫貢天京  
巧匠裁雲鏤月成  
似審八音調管龠  
先齊七政副璣衡  
舊編文粹年年換  
新構書巢種種精  
拈斷吟髭非自苦  
安排舞曲頌昇平

疎野

風光四面到柴門  
澗竹巖花界作園  
綠柳成行鶯井里  
青秧彌望鷺乾坤  
貪看釣艇歸來暮  
偶詣鄰農笑語溫  
倉卒奚囊攜未得  
援毫欲寫已忘言

清奇

階前一鶴鳥中仙  
已號胎禽忘歲年  
身瘦不緣無廩粟  
俸餘時爲買山田  
偶聽琴曲來朱閣  
忽引詩情上碧天  
傲岸不諧塵濁意  
此生端合老林泉

委曲

湘水九迴衡九面  
深情一往更盤紆  
五紋長綫摛成錦  
百丈游絲紡作纆  
有跡可尋蠶食葉  
無微不入蟻穿珠  
離騷上接詩三

百淺識蘊才辨得無

實境

一邱一壑景無涯一鶴一琴情自賒  
數頃田園餘穀果全家眷屬課桑麻  
壯懷猶撫劍三尺舊學未忘書五車  
堪幹莫嫌華飾少四時長有映山花

悲慨

千古雄豪安在哉  
自哀不暇後人哀  
成功種蠶誰能賞  
齎恨荆高去不迴  
江月照人寒似水  
雪風搖樹響如雷  
更長鼉吼不成寐  
起作狂歌和吹臺

形容

古今絕妙丹青手繪影繪聲無不長點綴鳳鸞圖樂曲指揮蜂  
蝶寫花香澄懷體物千端變要訣通神一語詳開戶起延明月  
入瓦空雲漢見天章

超詣

苦吟鐙下倦推敲雋語忽來誰所教不共驚心爭棧豆終騰驥  
足邁蒲梢三千賢哲一顏子九六乾坤雙用爻樂奏鈞天凡響  
息獨聞清籟出笙匏

飄逸

藐姑射有神人居每馭雲龍造我廬授我一經河上注賢於八  
叟枕中書輕身導引從黃石抗首歌吟徹紫虛辟穀爲除煙火

氣餐霞飲露餌飛魚

曠達

開門長嘯風吹襟雲散遙天月滿林月有盈虧甯自主雲能舒  
卷亦無心伯倫常遣錘隨酒元亮不勞絃上琴詮罷漆園齊物  
論新詩漸覺道根深

流動

尻輪神馬與天游胎息淵閤氣自遒銅漏循環潮子午土圭長  
短日春秋雨從泰岱穿雲出江自岷嶓破峽流經史在胸杯在  
手縱橫萬象筆端收

輓陳松生四首



往歲傷吾妹仲瓚今哀妹壻比諸昆豈緣婚媾私增慟正惜英  
髦僅有存楚寶年來無後勁湘纍時復益新魂人亡邦瘁天何  
意欲藉巫咸問九閭

昔年兄弟客閩中瘴國喧傳喪士龍九死一生仍健在千歡萬  
悅又相逢悲歌不諱露零薤貞疾自矜霜壓松此去窮泉薶玉  
樹再生無復望前蹤

梯航萬國集中都聞見新奇古所無玉敦珠槃聯晉楚火輪電  
線滿寰區與民圖始解人少此子云亡吾道孤覆簣祇今纔一  
簣舉隅誰復反三隅

謬持英蕩出重洋同駕輕輶歷八荒百事資君如右臂六年爲

我竭中腸雌黃怙安衣無縫處白精詳綱在綱集木臨淵憂未  
已蒼天殲我百夫防

送松生殯城西饗堂歸來夜不成寐作詩自遣

弱不禁傷奉倩神嗟來桑戶返其真伊人自爲有情死顧我何  
須無病呻埽去目前千緒惡迎回胸次四時春祇愁他日耆英  
會絕少鬢年唱和人

哀弟栗誠從弟符卿思臣暨余佐卿陳松生

惡曜侵陵軫所都江蘼蘭芷逐年枯昔除期服除功服連哭姨  
夫哭妹夫逝者狂飈掀脫葉悠然明月照空湖數生羸健終何  
異同入眞靈位業圖

次韻答日本人金尾藍田

稜嚴

詩律探源飯顙山  
郵笥酬唱各驕閒  
遭時情異三閭憤  
感事愁添兩鬢斑  
責自西鄰憂未已  
交聯東國誼相關  
輔車記取先生句  
共濟羊腸九折艱

哭外姑劉母王夫人二首

夫子醇儒四海尊  
兼三不朽德功言  
匪躬之故王臣蹇  
能代有終地道坤  
勤儉起家聲夏大  
寬仁及物澤春溫  
遙知鸞鶴騰空日  
雨泣孤嫠遠近村

拜別慈雲走  
帝都滿腔愁苦貌  
歡娛始看祖道辭  
鄉國更念穹廬寄  
海嶠  
八厯春秋弦上矢  
雙憐堦女掌中珠  
助營喪葬嗟

何及遺像傳神手自摹

王芑棠觀察之春題歸樸齋詩集次韻謝之三首

賦就呈皇甫三都藉序彰參禪輸玉局護法得金剛  
檀貴珠增價丹成鼎吐芒欲酬青玉案萬頃莽洋洋

儋州積鬢叟千載仰薪傳孰和仙人杞羣推相府蓮  
追蹤在海表卻瘴緣天全展卷衡今古蘭膏徹曙然

薑齋老尊宿述作何閔深學博水歸海譽隆磁引鍼  
觥觥讀史論藹藹匡時心崇德以繩武因風爲子吟

次韻答芑棠二首

百萬貔貅集漢營單于衷甲請行成顓臾非復東蒙主  
徼塞收

回北府兵已有星輶臨郤地方聞露布報  
神京和戎自古無  
長策且喜洪濤一鏡平

議戰議和君子爭大功初不問誰成金戈耀武重洋震玉敦尋  
盟四海清垢穢自知餘短綫棄繻甯爲請長纓是非付與與人  
論事定褒譏似準平

疊前韻再和芎棠

韻窮詩益美交久道彌彰厚意三重釀精詞百鍊剛談兵惜運  
會厲世含鋒芒讀罷長舒嘯天風捲浩洋  
艱貞祇自矢情志向誰傳晝靜階堆蘚更長漏轉蓮頻年驚戰  
伐無術策安全良友天涯遠懷之心欲然

越裳霑 聖澤浩蕩海同深  
頒朔已無廟指南空有鉞  
鵬張行 接踵蠶食競生心  
岑絕青鐙下因君發楚吟

絕嶼分屯上將營折衝樽俎報功成  
安存業業孤懸地倚仗寥寥客寄兵  
形勢自雷聯北海威名入越震東京  
防秋處處如瓊

島萬頃鯨濤一霎平

泰西人稱暹州三汶江通商埠  
爲北海稱越南交趾爲東京

驟犯閩臺啟忿爭衝機無利遽求成  
卒還侵地歸函夏共慶皇天祚  
聖清奉 命中朝漢使節立功南越  
終童纓可能恢拓邊隅界長致炎荒  
衽席平

哭仲父澄侯公二首

昔年丁丑暮春初拜別慈顏發笥興  
絕國海程三萬里老人郵

寄百餘書龍蛇在紙雲煙護烏兔遄躔日月除生別蹉跎成永  
訣坐羈塵鞅密親疎

仲母瑤池駕不旋經時仲父復游仙六旬雙壽庚辰夏五福全  
歸酉戌年 誥印金泥綸綍重庭羅玉樹子孫賢固知遺憾無  
豪髮瞻望雲天總黯然

留別劉芝田太常二首

英蕩辭朝候雁來年年不與雁俱回雲雷有象隨著變鬢髮無  
情藉鏡催自媿多言常越職姑求寡過敢矜才節旄方落羝羊  
乳更喜同岑匪異苔

昔別明公東海隅相逢西海各羈孤八年何異駒過隙百事慚

非馬識途英國使兼俄國節前車光借後車珠公歸更有無窮  
事異日東行莫憶鱸

次韻答王子裳詠霓四首

大食犁軒黠憂斯史誇王會漢唐時 熙朝化及三千界仁術  
賢於十萬師一德感孚灰應瑄四鄰征戰客爭棋 廟堂方重  
安邊策漸補羊牢未是遲

拿破崙坊紀戰功威名當日此洲中兼收符璽王三國強設敦  
槃盟八戎萬礮凝煙天宇黯百城流血海波紅乾谿一敗前功  
棄未息蠻荆獷悍風

謬佩銅符騁傳車頰中存舌粲生花吾人縱解雕龍辯敵意方



同碩鼠賒英蕩有期隨反節包茅無貢附歸槎艱難厯盡成功  
小雨泣孤臣海一涯

無翼雲鵬掠海飛乘之東去換征衣八年風雪身將老五夜波  
濤夢已歸邂逅醅醪先自醉激昂佳句復相暉未知此別重逢  
日泛梗飄蓬約再依

次韻答楊誠之兆鑒四首

墨色雲封大海隈飛濤汗漫接天回久禁霜雪羈遐域跂望星  
辰列上台使職自慚無報稱 皇恩今許賦歸來西風未息  
秋盈水碧浪迎槎一線開

五夜霜華赴早朝罷朝霜氣未全消 東華退食金尊暖 上

苑尋春玉勒驕星日九重天曠闊琛寶萬國海迢迢婉無勲績  
同曹富歸事文章學顧姚

黃堂喜識謝方明青眼吾從阮步兵秋水馬蹏聆妙論雪泥鴻  
爪惜過征同評五色清醪品細辨三元飴飯名祖饌詩工酬和  
拙劣申銜戢達深誠

苦蘄新竊琥珀香離筵無算盡霞觴主人名望許平仲幕府才  
華朱叔陽妙選南邦湖海士同居西極水雲鄉我攜樂職朝闈  
闔相遲春明續拜颺

次韻答許竹筠四首

志趣徒宗范慶州佐時無可紀勳謀奇書嬾復蘊頭譚豪氣消

成繞指柔海國八荒蠻觸靖  
朝堂九列鳳摩游高風未敢師  
垂釣怡羨鱣魚歲歲秋

昔年南徼驟鏖兵將帥桓桓授鉞征鼉極三山終古峙鯨濤萬  
頃霎時平敵軍宵遯紅江岸電報朝騰紫禁城戰罷珠槃新  
歃血皇威從此震寰瀛

谷道防軍未可裁軍儲何處利源開礦金投冶光凝日鑊水行  
車響迸雷赫怒直將平四表殺機那慮發三才樹人遠作  
百年計縶土終成千仞臺

鬢髮相憐瘴霧侵客中酬勸酒杯深雲霞鬱鬱暮天話風雨淒  
淒秋夜吟各荷聖恩魚在藻同縻好爵鶴鳴陰公門桃李

春無極示我英賢去訪尋

輓李香巖

勉綴哀詞侑奠尊慚持布鼓沓雷門卅年金石論聲氣萬國雲  
濤接夢魂胡虺倦飛蒙叟邈杜鵑歸去蜀山昏事功文采都難  
泯故紙殘縑若爲存

次韻答左子興二首

暮堂蝙蝠室伊威廬舍就荒今始歸雲近東瀛增瑞彩山環中  
夏漸清暉浮槎下碇勞迎候故節無旄媿指揮相慶滄溟鯨浪  
息敷天堯德頌巍巍

蔗竿如柱藕如船此味不曾經八年蔬果飽餐除腐滯笑談豪

縱脫拘纏鳥方出谷已遷木龍未躍淵猶在田事業無窮賢者  
勉期君處處著先鞭

次韻答陶槩林丁亥元日二首約人日同游琉璃廠書肆  
兼訂逸齋做庵

檀不如梨百果宗爲箕未似敢言弓濫叨雋譽陰鳴鶴猥席前  
徽陸漸鴻秣馬脂車馳絕境雕龍炙輶動羣雄歸來朋舊憐霜  
鬢禪寺松枝爲我東

草樹連盆花正妍對花中聖復中賢客忘迎送嵇康懶書雜眞  
行米芾顛龍象多情分贖屋牕塵拜 賜記新年相邀共訪繁  
華地人日城南尺五天

次韻答王壬甫

紅海爨將帆作翅黑洋蝦以柱爲鬚時驚颶母挂東極便恐水  
神招左徒黃赤兩躔溫冷帶丹青四幅聘盟圖光陰太速歸忘  
老強跨青驪學壯夫

雙顴瘦骨滿頭筋羸態親朋認不真黃霧霏霏重遇子青瞳弈  
弈尙如神談鋒條貫海天際詩律降從唐宋人湘綺外編游戲  
筆騷壇誰與競清新

疊槩林前韻柬莘畚仁安光普瑞生兼呈逸齋傲盦

醉後軀骸金液冶忙中歲月矢離弓埽梁更候今春燕濡筆行  
圖去歲鴻六合坤乾新氣象一庭賓友舊英雄平原縱飲駒過

隙聯轡將軍馬首東

世變浮雲態萬千 廟堂虛已信仁賢周興勤恤魚賴尾秦大  
空誇馬白頭鶯粟花開從處處樽桑枝長自年年金輪卅輻終  
環轂甘露和風共一天

壽彭麗生丈

黃竹干霄海有塵滄浪天外轉風輪聊同犀首列游士敢羨虎  
頭威遠人射雁 上林書係足牧羝遙塞節隨身崔積劣賸詩

懷健閭徵諸宮祝好春

丈自壽詩爲五言古今茲之和乃以長律故末句云爾

直道黻黻福所歸清門遞嬗老萊衣雍容里閭延鄉飲寂寞江  
天映少微歌嘯鳳鸞齊協呂情懷鷗鷺共忘機南躔低處雲藏

月隱隱飛樓百尺巍

題索佳奇卓崖先生家書冊後

至文初未冀流傳萬里郵  
簫勸象賢事在當時隨意寫  
語無不可向人宣  
光風霽月三千界  
玉躋金題廿四篇  
妙道會宜公世俗一篇劖劂當韋弦

聰訓齋書世所師  
清純殆勝顏之推  
謂言秋葉實凋日倚伏  
春華開放時  
疏食從來饒至味  
格言那在著迂詞  
先君遺訓張公語  
鼎足茲編九達達

哭廣錫兒

冰雪無塵玉絕瑕  
每憂風格太清華  
何緣佛國菩提葉  
託跡人



間頃刻花英物試啼那可信神童示疾幾曾瘥明知天壽同終古牽惹情懷正未涯

題日本使署參贊官槐山龍溪鼎介所藏石拓賀季真草書孝經

四明狂客酒中仙詩句崑山片玉傳詩酒餘閒揮草隸紈縑眞蹟散雲煙一編醉帖來滄海萬里迴光照剡川長史蕭疎虔禮密權量銖寸定誰賢

題張友山中丞頤園圖

疊石爲山蓄水池數弓園就命名頤潭心印月雙輪潔山下鳴雷萬物滋笙間補聯風雅頌  
徽章永寶綉綸絲栽松未作

龍鱗老已是東山再起時

題吳禮耕遺像并事蹤圖

黃鵠翩翩魯仲連  
超離塵鞅非煙靑  
山碧柳存圖畫綠  
水紅蓮隱儔賢激  
豔蟻浮腸似海扶  
搖鵬連翼垂天龍  
湫不具通神筆  
浩蕩情懷誰與傳

題徐頌閣少宗伯見示月儀帖

并引

南史載任昉八歲能屬文自製月儀辭義甚美宣和書譜稱內府所藏章草有索靖書月儀今復覩此月儀揚本則標以右軍亦在昉前蓋尺牘乃當時風會所趨才士撫景攄情驚時感物次第程式月爲一章前勑後循

圖相跨越畱遺筆蹟代有甄存文異題同何足爲怪余  
觀茲帙書信飄逸饒有晉風語益纖穠似興齊後將無  
後人文句集王書錄之興梁之千文唐之聖教序類耶  
臆說莫可質證以模稜語賦之

八歲兒郎任彥昇月儀辭義到今稱書家恰有東西晉筆勢誰  
評上下乘分路揚鑣存軌範綴衣成衲襍縑繪幼安逸少非難  
別銓判根源媿未能

次韻題恭邸歌唐集句圖

拈斷吟髭正未疲天倪和處證希夷湘鄴綠蟻頻中聖河雒青  
龍自得師縹帙開緘間氣集衲衣無縫他人詩洪鑑襍著金三

品鎔鑄功成一例奇

鍵戶微吟似候蟲  
騷壇忽羈鶴鵝中  
未將凡骨金丹換  
正與雷門布鼓同  
元唱列星聯異軌  
新圖明月耀長空  
主人方珥淩雲筆  
更和清琴解愠風

以團扇求叔平丈書自作詩未得朝廊待漏聞誦頃者致  
它人詩有人與秋鶴同一病之句不無歆慕歸呈一律

寸束餘縑偶見之  
煙雲過眼儘堪怡  
必求珍物屬吾有  
未免俗情聊爾爲  
邂逅成章都絕致  
等閒游墨總能奇  
請將垂露驚蛇筆  
只錄秋風病鶴詩

叔平丈既書扇乃人與秋禾同一病耳再呈一律

黃埃障日飛晴霾蒸鬱相凌無好懷明月半規開竹扇祥雲五色起蕭齋書涵古墨濃於雨句斂神鋒巧莫階遽聽秋禾作秋鶴媿余詩律未求諸

題自作畫

苦瓜

竹架錦蒲桃雲開星月高赤心不自表清氣上修豪

龍眼

蟾蚌石蟹各因時龍眼何曾遜荔枝苦味深尊沈醉後爭珠莫訝屢探驪

爲佩衡相國丈畫蟠桃靈芝題平仄句一律

旭日照上苑蟠桃來西池爽氣蔚作實祥雲蒸成芝寫以頌嘏  
錫餐之臻期頤拙筆不足道題茲純聲詩

題徐小雲少司空竹隱廬圖

蒸水之濱竹所都綠筒繡蕩相紛敷千竿小院不嫌密一日此  
君何可無越陌添篁迷徑路編籬畱葉護根株十餘年別耐寒  
友三兩幅存消暑圖

淵子天台竹隱廬雅名今隸海鹽徐聊從畫境思真境且祝新  
居勝故居文筍薦羞披霧豹長竿垂釣足池魚與君各有簞簞  
谷豈不懷歸畏簡書

爲潘伯寅大司空畫師子紈扇率題一律

并引

阿刺伯人云虎豹殘很遇物則殺師子飽而嬉人禽過其前往往釋而不搏嗚呼此其所以長百獸而霸山林歟英吉利國稱雄泰西軍國大纛及宮廷印章皆雕繪師子與一角馬爲飾殆與俄羅畫北極之熊佛朗西日耳曼畫鷹隼者各有取義東坡生平不聞得見師子而於屏風畫師子讚乃有雖猛而和蓋其戲之句一何當也孟康注漢書西域傳稱師子似虎正黃有顛形尾端茸毛大如斗虞永興賦亦曰修尾勁豪今世畫師畫師顧著以翠藍深綠無異上元張鎰兒童所縛拳毛蒼狗又去其修尾而專披尾端如斗之毛蓋茲獸之未經目

擊久矣紀澤奉使歐羅巴洲八年於西人動物苑中鐵檻所參見之數十百次爰圖真形繫之以詩

法尙蒼鷹俄白鵞英蘭旌旆繪黃師自矜雙瑞驪猊璽蔑視羣雄鳥隼旗雖猛而和坡老贊非飢不殺土人知畫師相率塗青碧乍覩真形轉見疑

爲徐頌閣宗伯畫師子執扇題律

并引

紀澤旣爲鄭憲大司空畫雙師子識之數語而繫以詩頌閣先生宗伯顧而賞之復出執扇命爲同式畫圖兼錄詩記往在歐羅巴洲頗多暇日簿領竣事輒復出游劇場舞榭襍技幻人雖足悅目爽心然境過絕少畱戀



無再往者獨頻走公囿攷求動物未嘗厭倦心目中蟲  
魚鳥獸奇狀異名闕貶甚夥師子毛羣之特蹲伏行臥  
往來前卻喜怒飢飽嬉娛攢斂狙伺搏擊之變相尤著  
意焉牽諸胸次放之挽底電睨雷吼意態天成雖位置  
殊觀山林異勢而威稜材力雄詭傑偉庶幾與前畫同  
工乎

平野迴風谷吐霓點晴重現兩狻猊疊調黃赭開生面試審丹  
青證舊題德盛兩階陳舞羽威行八表靖征輦異時王會圖方  
物添寫麟虞禼象犀

題畫

溪水近涵山影高  
蘆生沙漲劣容舸  
兩三漁父煙中語  
各網肥魚相對豪

鬱鬱嵐光接水濱  
連天蒼翠靄難分  
蘆叢樹杪清涼氣  
飛上遙峯成白雲

爲丹初相國年丈作瀑布圖題二絕

綠野堂成素壁虛  
新圖雲樹小匡廬  
試移牀榻鄰飛瀑  
定有濤聲午夢餘

虎變龍盤願並酬  
先生清福世無儔  
胸中次第好林壑  
不藉丹青供臥游

次韻答何潤夫乃瑩見賀五十歲生日

水部清才夔絕倫重圍咫尺閤參辰叨陪鷺序鴻儀後失候龍  
翰鳳翼人苻菜周南開九夏梅花嶺上冠三春聊斟舊釀酬新  
什那惜金貂換百巡

題所畫繆石逸延福紈扇

跋望甘霖蘇萬枯筆端符得化工無姜詩焦易書成幅更畫青  
山雨後圖

題所畫孫燮臣少冢宰世丈紈扇

并引

已丑夏五亢陽得雨雖未霑足朝野銜歡遙天乍晴  
青白相閒而濃絮翻墨餘潤當頭濡毫吮水以寫烏雲  
變幻之奇頗復肖似圖成輒題一律

洪鑪熅火地生煙塵塏浮空草樹蔦倬彼爲章天有漢偶然離  
畢月乘權山椒雲氣濃還薄澗山泉聲斷復連終有沃霖酬

請禱暫施微雨灑煩煎

題所畫徐頌閣少宗伯扇

搜攪潛淵起睡龍風迴驟雨作前鋒巖泉帶注潞間溜山樹妝  
呈沐後容億兆歡呼聞吉語九重旰食憫勞農鐵牌新自邯  
鄲發別有烏雲蘊異峯

題所畫吳漁川甥扇

山勢飛翔水折旋靈湫潑墨應龍眠傳之羽翼迴滄海趁得風  
霆上碧天淨濯園花清俗障昭蘇田穀轉豐年騰霄一霎成嘉

續長泳

恩波百仞淵

爲醇邸畫宮扇二柄各題一律

晦翁絕句十畝方塘一鑑開天光雲影共徘徊問渠那  
得清如許爲有源頭活水來謹演詩意成圖並引申爲

長律

游屐歸來日未昏晴煙散處數家村泉聲賡續諸宮角山勢迴  
環列子孫翠髻碧螺澄有影白衣蒼狗變無痕天懷久信忘塵  
壒更瀉靈源濯性根

司綽百立譯言草果未熟時常須覆草衛護其根故名  
紀澤以其五月登盤又稱之爲龍船果謹繪摘實盛於

筠簾兼寫折枝存其意態

龍船果產歐羅巴自比安期海上瓜勤覆草菅冬禦雪廣連畦  
眇夕明霞階欣冀英符堯蓀篚伴葡萄貢漢家暫寫盈筐  
呈左券更圖枝葉表輝華

附錄 醇邸和章

海氣晴消倦眼昏依稀孤嶼認煙村

丙戌泛海情況

禁中新侶陪

頗牧化外遺編邁鄧孫

侯近注外國事跡進呈

玉帛雍容言有信梯航

迢遞夢畱痕谿山不是尋常筆成竹羅胸萬事根

水聲雲態活潑逼真

宛若海邦風味

八蠻六詔復三巴都橈多南更石瓜試問譜中標異卉誰

從海外翦流霞  
櫝藏火齊來  
荒微爐鍊丹砂  
學道家卻憶

米孫烏什哈關山東望日光華

謂語米孫爲醫烏什哈爲星果名產吉林

應教繪扇題詩蒙

醇邸依韻賜和并惠石揭

四

聖御筆書畫謹疊前韻賦謝

多士游魚仰瓠巴  
求才不倦杞包瓜  
虛懷澄印千潭月  
瑞氣蒸成五色霞  
不廢菰文垂激賞  
寬收圖畫附名家  
九重宸翰霑餘潤  
兩什王言耀霽華

巴黎案牘劇朝昏  
偶訪畸人萬果村  
環圖嘉梨踰百種  
盈株甘橘衍千孫  
含香有麝融新實  
接幹成龍混舊痕  
草果儼容栽

上苑蟠桃亦許毓仙根

法蘭西靈士餉界雨事母甚孝以灌園起家花果經其培植無不蕃庶司神百立一品尤爲各

冠國之

附錄 醇邸和章

搜奇李獺曲慚已略比清泉助魏瓜友誼詩賡青玉案

宸章光煥赤城霞經營事竟空千古運會天教漸一家  
締造守成心法貫拜颺敢詡貌言華

瘴雨蠻煙想翳昏誰知綠樹各成村萱花香裏佳兒婦珍

果枝頭茂子孫

宋祁天仙果實有子孫核不花而實傳青采之味將  
蜂蜜按天仙果如櫻桃味甘似與司緯百里仿佛

八載旌車雲鵠志四方蓬矢雪鴻痕采風深意吾能說自

古忠從孝立根

法國某孝子事見上

次韻奉和 醇邸玉照亭賞梅一律



會陪玉照亭中座含笑梅花正索詩暖蕊近爐仙蝶駐寒根穿  
壁蟄龍知傾心石刻師吟賞撲鼻瓊英入夢思南極老人來介  
嘏應招雙鶴繞橫枝

附錄原唱

去歲清芬邀 駐輦者番冷豔爲催詩涉園花與客相  
識舉酒客疑花已知松柏祝翁無量壽棣華顧我有餘思  
老梅祇管春消息作意臨風放數枝

附錄 醇邸和章

等閒雅集開生面酒國奇方海國詩玉樹交柯三世誼

近始

識重伯  
昆仲

竹筒分韻兩心知盪胸雲蘊都成趣叉手才高不

待思記取小陽霜雪裏寒香折贈最先枝

邸園侍飲蒙賜長律謹疊前韻奉和二首

半日園林陪勝賞九天珠玉注前詩煙籠碧樹簾初捲雨濕青

苔展不知念舊高情憐後進

謂左文襄之孫念謙

論文雋語耐深思金樽輟

酒盤堆饌瓜落新藤杏摘枝

離合每從孫恂韻泠然天籟協新詩

唐韻二百六部劉淵黃公紹併爲一百七部陰氏時中時夫兄弟復併上聲之拯部

則一百六部矣元與魂痕音韻迴殊古人通叶以入詩可耳乃徑併爲一部邸意甚不謂然

閒聽駛舌成蠻語已向蟬編證

獨知

真文元寒刪先六韻十四部與侵覃鹽咸四韻九部有開口合口之分是以古人分別部居殊爲兩類今唯兩微語言能辨此音邸府偶聞粵人共話遽察其異審音攷古諸家能知此

者題矣

講菽渾忘紅日昃感恩振觸白雲思飫承膏馥資霑勻潤

及庭階玉樹枝

是日胞姪蘭鈞隨同晉謁

蒙 醇邸賞五色菊四盆賦謝

明霞萬里擁蒼龍  
山鎮青陽淑氣鍾  
異卉形同延壽菊  
貞蕤性比耐寒松  
紛呈五色朝連暮  
徧閱三時夏到冬  
珍重混同江介種  
邸園分畀露香濃

附錄 醇邸和章

騁驅伏櫪弔長弛  
自笑區區賸作詩  
偶事倡酬原小道  
卻將懷抱訂深知  
書香繼起雙峯秀  
畫意遙生八表思  
擬借修篁喻佳句  
清風戛玉一枝枝

鴨綠江源派黑龍  
遼東佳氣自天鍾  
花名五鳥雲蒸石  
苔蘊千年雪壓松  
有用藥皆稱上瑞  
無名卉亦耐嚴冬  
憑君

栽向霜籬試蒲柳凋餘豔轉濃

題瞿子玖學士王父魯青府君手寫自濟圖暨德配湯太

夫人分鑑課子圖

天池鬱霧接天昏海國流槎掠海驚少壯老歸圖一幅去來今  
寫佛三尊行經玉闕朝元路泊向銀河積慶源長往煙霞終不  
返楹書濟世付兒孫

意承姬孔道誠存儒效一篇那易言彤管生花門祚盛青鐙如  
豆杼聲喧清芬瑞叶同心藕義訓功資樹背諷此日慧龍傳舊  
德當年雛鳳列慈根

題李之純所藏岳忠武名章印本

甘就偏安宋主辱長城自壞非天慳古來權貴興冤獄天遣忠  
貞示大閑汗馬奇勳傳婦孺雕蟲小物重區寰紫檀印匣今何  
在應拓宸章警懦頑

次韻答瞿子玖學士題歸樸齋詩集一律

雲垂大壑臥虯起風捲長空飛隼橫豪句君今搖筆是逸情誰  
與並鞍行材慚十駕終驚質道悟三乘亦強名銓品從知多溢  
譽聊欣瓦缶引鐘鳴

題所畫十三弟靜臣扇

阿連遺我繡毼氍蘭味香枏十八珠我欲酬之無可寄聊圖福

海壽山圖

萬里融風釀太和時平滄海不揚波青牛白蝠閒來往靜對蓬  
山縱嘯歌

題所畫俊師姪扇

琴韻機聲西復東屋廬知在此山中縱橫亂石環池起左右長  
林寬徑通樹杪懸鉤秋月白天涯散綺晚霞紅翛然一境塵囂  
外何日清游與爾同

題所畫聶仲芳觀察妹丈扇

朝曦出海月斜初五色煙雲飾太虛憑我丹青摹造化祝君緋  
紫啟權輿陽關四句唱三疊天保六章圖九如詩畫證余情趣  
永攜歸兼代大雷書

題所畫邵筱村中丞扇

鼇極鯤冥一葦杭歸來游興未渠央  
蟠胸豁壑成瓊瑋轉腕雲煙接混茫  
湘水南過衡嶽麓洞庭西是武陵鄉  
丹青合遣湖山證又一村同有美堂

題所畫郭仲詒外甥扇

新自江山勝處來騰掀雙轂走黃埃  
空庭繫馬樹枝動小院鳴蜂花蕊開  
萬里豪情滄海外五更清夢野雲隈  
畫圖聊爲舒伊鬱巒障青螺水綠醅

題袁爽秋農曹利詩集

游絲飛霧繞鐘槃靜展閒篇乍眼明  
豪氣觚觚貌扶石清音嫋

嫋鳳諧笙三十世界迴星宿百二關河隱甲兵私淑涪翁吾亦  
頗輸君妙手得天成

次韻答日本使大鳥圭介公譙詩二首

嘉釀如渥斗斛量主賓談宴絕關防青疏畫關琅玕院綠意春  
生薜荔牆互慶友邦成璧合同歌樂歲得金穰酒闌分惠新詩  
草晚靄雲煙繞畫堂

海客叢談任洸洋世儒翻謂不狂狂欣看妙筆雙關意似放明  
珠十乘光曉日搏桑蒙谷朗春風棠棣比鄰香獅鷹隆替罷消  
息付與虞人絜短長

壽陳寶渠太守福勳八十生日



傾蓋當年意氣親高談狂笑各天真揮毫落紙墨翻盤把臂入  
林枝挂巾階莢循環鵬蜚嬾谿藤往復雁魚頻瀛洲近報蟠桃  
熟遙舉金尊祝好春

清輝午夜照谿堂見老人星主壽昌志健北山仍采杞時平東  
海可栽桑新年介嘏添春釀異域來賓酌夜光媿我俗塵盈萬  
斛長歌未足叶笙簧

題所畫劉博泉給諫恩溥扇

曾控蒼鵬運兩冥鼻端龍氣尙鮮醒含將上谷盈升墨戲作神  
山數點青落日魚飛水激瀟寥天鶴去風清泠圖成試奉先生  
賞似有清聲起迅霆

節旄落盡趁歸舟重見非煙擁禁樓絕域乍回孤島鶴前盟未  
證五湖鷗圖書束閣巢蟬蠹簿領成堆汗馬牛賸有襟懷寬似  
海塗雲寫水座生秋